



Broj/ Број : 02/2-50-1-23-30/09

Sarajevo/ Сарајево: 24.7.2009. godine

ZAPISNIK

30. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine, održane 24.7.2009. godine

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije, u svojstvu članova, prisustvovali su: Alma Čolo, Dušanka Majkić, Adem Ibrahimpašić i Slobodan Šaraba i Branko Zrno, te Nenad Pandurević, sekretar, i Dobrinka Savić, stručni saradnik u Komisiji. (Rudi Vidoviću je, zbog prelaska na dužnost ministra saobraćaja i komunikacija BiH, prestao mandat delegata u Domu naroda PSBiH, pa time i članstvo u Komisiji, a odluka o imenovanju Bože Ljubića za novog člana Komisije još nije bila stupila na snagu).

Sjednici su, u svojstvu predlagača i izvjestilaca, prisustvovali: Sven Alkalaj, ministar vanjskih poslova BiH, Sead Avdić i Nebojaša Regoje iz Ministarstva vanjskih poslova BiH, Igor Petković, savjetnik zamjenice predsjedavajućeg Doma naroda Dušanke Majkić, i Zoran Brkić, viši stručni saradnik u Sektoru za odnose s javnošću u PSBiH.

Sjednica Komisije počela je u 9 sati.

Sjednica je održana zajedno s Komisijom za vanjske poslove Predstavničkog doma PSBiH, s obzirom da je dopuna Informacije Ministarstva vanjskih poslova BiH o stanju i razvoju DKP mreže Bosne i Hercegovine Parlamentarnoj skupštini BiH dostavljena prethodni dan, 23.7.2009., te da su obje komisije bile dužne dostaviti svojim domovima mišljenje o Informaciji za raspravu na nastavku zajedničke sjednice oba doma koja je zakazana za 24.7.2009., u 10,30 sati. Također, ministar Sven Alkalaj zamolio je da se rasprava vodi objedinjeno kako bi on bio u prilici prisustvovati sjednicama obje komisije. Iz Komisije za vanjske poslove Predstavničkog doma sjednici su prisustvovali sljedeći članovi: Slavko Matić, Azra Alajbegović, Husein Nanić, Sadik Ahmetović i Denis Bećirović, te Miroslav Stanišić, stručni saradnik u Komisiji. *(Napomena: Ovaj zapisnik sadrži samo diskusije i zaključke Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH, dok su diskusije i zaključci Komisije za vanjsku politiku Predstavničkog doma navedeni u zapisniku te komisije).*

Predsjedavajuća Komisije predložila je da se Zapisnik 28. sjednice ne razmatra na današnjoj sjednici, zbog efikasnijeg korištenja vremena, kao i zbog činjenice da je Zapisnik dostavljen neposredno pred sjednicu.

Nakon što je konstatala da postoji kvorum za rad Komisije, predsjedavajuća Komisije Alma Čolo je za sjednicu predložila sljedeći

D N E V N I R E D

1. Razmatranje Dopune Informacije o stanju i razvoju DKP mreže Bosne i Hercegovine (dopis Ministarstva vanjskih poslova BiH, prijemni broj: 01,02-50-3-754-1/09, od 22.7.2009.);
2. Tekuća pitanja.
 - Zahtjev Ministarstva vanjskih poslova BiH za prijem novoimenovanog generalnog konzula.

Predloženi dnevni red usvojen je jednoglasno.

Ad. 1. Razmatranje Dopune informacije o stanju i razvoju DKP mreže Bosne i Hercegovine (dopis Ministarstva vanjskih poslova BiH, prijemni broj: 01,02-50-3-754-1/09, od 22.7.2009.)

Predsjedavajuća Komisije predložila je da se o ovoj tački dnevnog reda rasprava vodi objedinjeno s Komisijom za vanjske poslove Predstavničkog doma ali da se izvještaji domovima dostave odvojeno. Podsjetila je da je Komisija već razmatrala Informaciju Ministarstva vanjskih poslova BiH i da danas treba da raspravlja samo o njenoj dopuni, dok Komisija za vanjske poslove Predstavničkog doma danas treba da razmatra i Informaciju Ministarstva vanjskih poslova BiH i dostavljenu dopunu.

Ministar Alkalaj kratko je obrazložio dopune informacije kao i zahtjev Ministarstva vanjskih poslova BiH da se dio dopunjene informacije povuče, odnosno ne razmatra ovom prilikom. Dodao je da se radi o dijelu dopune informacije koji se odnosi na analizu racionalizacije DKP mreže, dok se ostali dio dopune informacije može razmatrati. Kao razlog za povlačenje ponovio je razloge navedene u zahtjevu za povlačenje: odsustvo cjelovitog tretiranja zatvaranja Ambade u Argentini, odsustvo stavova Predsjedništva BiH u vezi s tim kao i način obrade ove analize.

Dušanka Majkić istakla je da u slučaju oba materijala, dostavljena od Ministarstva vanjskih poslova BiH o stanju u DKP mreži, nedostaje izjašnjenje Predsjedništva BiH, u čijoj je nadležnosti vođenje vanjske politike. Pored toga, istakla je da ni Vijeće ministara BiH nije dalo svoje mišljenje o dostavljenim materijalima, odnosno nije se o njima izjasnilo. S obzirom da dostavljeni materijali sadrže samo stav Ministarstva vanjskih poslova BiH, dakle bez mišljenja ostalih relevantnih institucija Parlamentarna skupština BiH ne bi trebalo da se bavi njima. S tim u vezi predložila je da se na sjednici prihvati zaključak da se odgodi rasprava o ovoj temi dok se ne pribave sva potrebna mišljenja, odnosno izjašnjenja, kako bi se mogla voditi kvalitetna rasprava.

Predsjedavajuća Alma Čolo podsjetila je na zaključak koji je Komisija usvojila prilikom rasprave o prvoj informaciji Ministarstva vanjskih poslova BiH o stanju u DKP mreži koju je razmatrala na 28. sjednici. Istakla je da je tom prilikom konstatirano da u Informaciji nije odgovoreno na sve zahtjeve iz zaključaka usvojenih na 8. zajedničkoj sjednici oba doma

PSBiH, te da je jednoglasno usvojen zaključak kojim je zatraženo da se informacija dopuni u dijelu u kojem nije odgovoreno na zahtjeve iz zaključaka s 8. zajedničke sjednice oba doma Parlamentarne skupštine BiH (finansijski aspekti svake ambasade posebno, racionalizacija DKP mreže, četvorogodišnji plan rada i mjere i aktivnosti za realizaciju), kao i da se u Informaciji uvrsti i stav Predsjedništva BiH o svim pitanjima.

U vezi sa zaključkom Komisije s prethodne sjednice iznijela je svoj stav da su zahtjevi iz zaključka malo prestrogi, jer Komisija ne može natjerati Ministarstvo vanjskih poslova BiH da ishodi stav Predsjedništva BiH ako oni sami to ne žele dati, jer je Predsjedništvo BiH organ izvršne vlasti odgovoran za vođenje vanjske politike koji je u hijerarhiji iznad Ministarstva vanjskih poslova BiH. Komisija, odnosno Parlamentarna skupština BiH mogu direktno od Predsjedništva BiH zahtijevati njihov stav ali ne mogu Ministarstvo natjerati na to. Dodala je da smatra da je dostavljena dopuna informacije odgovorila na zahtjev iz zaključka koji se odnosi na finansijske aspekte svakog pojedinačnog DKP-a. Dio zaključka koji se odnosi na racionalizaciju DKP mreže uglavnom se odnosi na Predsjedništvo BiH, dok za dio zaključka koji se odnosi na četvorogodišnji plan rada smatra da nije realan jer ni Vijeće ministara BiH ne pravi četvorogodišnje planove. Predložila je da Komisija prihvati Informaciju Ministarstva vanjskih poslova BiH s dopunom informacije o stanju u DKP mreži a da se od Predsjedništva BiH zatraži da dostavi svoj stav o stanju u DKP mreži Bosne i Hercegovine, prije svega o racionalizaciji DKP mreže, razlozima za zatvaranje pojedinih ambasada kao i svoje stavove o prijedlozima Ministarstva vanjskih poslova BiH o otvaranju novih ambasada koje su navedene u informaciji.

Dušanka Majkić saglasila se da je zahtjev da se u informaciji o stanju u DKP mreži navede i četvorogodišnji plan rada nerealan, ali je dodala da ni sadržaj informacije koji se odnosi na finansijske aspekte svake pojedinačne ambasade za nju nije prihvatljiv. U dopuni informacije navedena su samo knjigovodstvena stanja po pojedinim diplomatsko-konzularnim predstavništvima, što, prema njenom mišljenju, predstavlja potpuno neupotreblijive informacije i potpuno beznačajne za raspravu u Parlamentu. Umjesto toga bilo bi mnogo korisnije da su navedeni podaci kao što su: broj ljudi u ambasadama, nacionalna struktura ambasadora, zamjenika ambasadora i radnika za konzularne poslove i finansije, da li je novac za rad ambasada bio dovoljan, koju bi ambasadu trebalo finansijski pojačati, itd.

Slobodan Šaraba podržao je prijedlog da se odgodi rasprava o dopuni informacije Ministarstva vanjskih poslova BiH, a za to je naveo dva razloga. Prvo, materijal je stigao samo dan prije održavanja sjednice, a osim toga prethodni dan su delegati bili zauzeti održavanjem redovne sjednice Doma naroda koja je trajala cijelo popodne. Pojasnio je da jednostavno nije bilo vremena da članovi Komisije razmotre dostavljeni materijal. Osim toga, iznio je mišljenje da dopuna informacije još uvijek ne sadrži sve informacije, odnosno da nije odgovorila na sve zahtjeve iz ranije usvojenih zaključaka. Precizirao je da, prije svega, dopuna informacije ne sadrži podatke koji se odnose na četvorogodišnji plan rada i mjere i aktivnosti za realizaciju.

Branko Zrno istakao je da je u dilemi da li raspravu treba odgoditi ili ne. Naveo je da je materijal dostavljen kasno, ali je istakao da Parlamentarna skupština BiH može otvoriti raspravu o bilo kojoj temi i bez ikakvih materijala. Međutim, da bi rasprava dala rezultate, neophodno je da bude dobro pripremljena i osmišljena. Dodao je da smatra da ne bi bilo racionalno danas pokrenuti raspravu o geografskoj raspodjeli diplomatsko-konzularne mreže, jer se ne može očekivati da se rasprava kvalitetno okonča. Na kraju je istakao da smatra da se neće puno izgubiti i ako se rasprava odgodi.

Adem Ibrahimpašić također je podržao ideju da se rasprava odgodi. Kao razloge naveo je činjenicu da je materijal dostavljen zaista kasno te da u njemu nisu dati odgovori na sve zahtjeve iz ranijih zaključaka.

Predsjedavajuća Komisije još jednom je istakla da smatra da je Ministarstvo vanjskih poslova BiH dostavilo informaciju te dopunu informacije i da je time uradilo ono što je u njegovoj nadležnosti. Za sve ostale zahtjeve iznesene u raspravi, odnosno u ranijim zaključcima smatra da su u nadležnosti Predsjedništva BiH te je s tim u vezi predložila da se članovi Komisije izjasne o sljedećem zaključku:

„Prihvata se Dopunjena informacija o stanju i razvoju DKP mreže o finansijskim aspektima diplomatsko-konzularnih predstavništava i traži se od Predsjedništva BiH da dostavi informaciju o racionalizaciji DKP mreže, razlozima za racionalizaciju kao i da dâ svoj stav u pogledu otvaranja novih ambasada i diplomatsko-konzularnih predstavništava u skladu s prijedlogom iznesenim u dopuni Informacije Ministarstva vanjskih poslova BiH.“

S dva glasa „za“ i tri glasa „protiv“, prijedlog zaključka odbijen je a predsjedavajuća Komisije konstatirala je da je većinski stav Komisije da se odgodi rasprava o Informaciji o stanju u DKP mreži dok Predsjedništvo BiH ne dostavi svoj stav o ranije donesenim zaključcima.

Za izvjestioca na sjednici Doma naroda imenovana je Alma Čolo, predsjedavajuća Komisije.

Ad. 2. Tekuća pitanja.

- Zahtjev Ministarstva vanjskih poslova BiH za prijem novoimenovanog generalnog konzula

Sekretar Komisije upoznao je članove Komisije sa zahtjevom Ministarstva vanjskih poslova BiH za prijem novoimenovanog generalnog konzula BiH u Minhenu Veljka Obrenovića. Dodao je da je dogovoreno da se prijem upriliči zajedno s Komisijom za vanjske poslove Predstavničkog doma odmah po završetku ove sjednice Komisije. Na prijedlog predsjedavajuće Komisije, dogovoreno je da u ime Komisije sastanku prisustvuje Slobodan Šaraba.

Sjednica Komisije završena je u 10 sati.

Sekretar Komisije
za vanjsku i trgovinsku politiku,
carine, saobraćaj i komunikacije
Nenad Pandurević

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo